

四庫全書

集部

欽定四庫全書

石倉歷代詩選卷二百二十

明 曹學佺 編

宋詩九十七

呂定

懷古

我昔遊海上東望三神山風波幾萬里蒼茫雲靄間魚
龍自掀舞天空日月閒神僊渺無跡徐福去不還空餘

蓬萊閣千載留人窠

追和蘇子瞻遊峽山寺韻

山迴寶華閣水遠金鎖灣
塵慮頓焉息于茲開我顏
疎鐘日夕動老僧林下還
天風吹白雲悠悠滿松闌
歸猿有餘悲月明嘯空山
僊人自何來翱翔八極間
手把玉芙蓉吟笑鏘珮環
歌罷忽飛去千峰堆翠鬟

赴京

太白樓前雨乍收
畫船撾鼓上皇州
肯因離別牽愁思

要把勛名事壯遊千里關河旗帶月一天星斗劍橫秋
胸中賸有安邊策此去應當獻冕旒

奉天門朝賀

曉日初臨萬歲山寶幢華蓋列朝班九重天上來僊樂
五色雲中識聖顏深殿捲簾香霧裊近臣傳制珮聲還
嵩呼齊祝恩如海散作陽和滿世間

調兵

年少談兵膽氣豪折衝千里豈辭勞旌旗影動秋風肅

鼓角聲回夜月高紅錦裁鞍新試馬黃金裝帶舊懸刀
臨征自信軍容盛五色團花繡戰袍

扈駕

八月秋高戰馬肥觀兵郊外振天威一聲鳳吹迎鸞馭
五色龍文雜袞衣劔戟橫空金氣肅旌旗映日彩雲飛
令嚴星火諸軍奮直斬單于塞上歸

班師

紫塞回鑾雪正晴王師百萬擁連營馬嘶大地山河壯

旗捲長空日月明
龍虎臺高千嶂聳
鳳凰城近五雲生
聖顏有喜天心順
中外歡聞奏凱聲

登東岳山

海內名山孰與齊
清風掖我上丹梯
鵬程九萬扶搖近
世界三千指顧低
瀑掛天門驚霹靂
雨蒸日觀出虹霓
太平會見東封盛
玉簡金書煥紫泥

雪夜

漠漠同雲徧海涯
曉風寒逼綠窗紗
飛揚鱗甲三千界

粧點樓臺百萬家何處妙歌金帳酒誰人清對玉梅花
便應石鼎融冰水烏帽籠頭自煮茶

望岱岳

岱宗東望鬱嵯峨萬丈僊橋鳥外過秦樹千年空老大
漢碑終古不消磨天壇夜靜垂星斗石磴春深長薜蘿
記得舊遊曾載酒頽然峰頂放長歌

望嶧山

極目東山秀色濃紫霄千葉醉芙蓉題詩尚記僊人洞

飛珮曾過玉女峰樹老孤桐秋露下碑殘古篆暮雲封
何時再醉天門月卧聽清風萬壑松

登彭城樓

項王臺上白雲秋亞父墳前草樹稠山色不隨人事改
水聲長近戍城流空餘夜月龍神廟無復春風燕子樓
楚漢興亡俱土壤不須懷古重夷猶

戲馬臺

據鞍揮指八千兵昔日中原幾戰爭追鹿已無秦社稷

金
卷二百二十
逝驩方歎楚歌聲
英雄事往人何在
寂寞臺空草自生
回首雲山青
蠹蠹黃流依舊遶彭城

夜宿甓社湖

湖光如鏡迴無山
耿耿銀河路可攀
萬象不移天地外
一塵能到水雲間
月明孤嶼森樓閣
夜靜飛僊過珮環
借問孟城何處是
微微燈火綠楊灣

金陵旅夜

一雨皇都萬象明
東風嬌轉上林鶯
火燵亭館春多少

鐘鼓樓臺夜幾更
枕上故園蝴蝶夢
枝頭斜月杜鵑聲
銀箋欲寫長相憶
滾滾江流不盡情

過小孤山

八月靈槎沂海門
翠雲臺上醉芳樽
峰頭樓閣相高下
水底魚龍自吐吞
萬古青天留玉柱
五更紅日擁金盤
宦遊不盡登臨興
欲洗蒼苔頌聖恩

登翠雲臺

一柱中流亦壯哉
分明世上有蓬萊
簾開廬阜層層出

船泛岷山滾滾來夜冷神龍蟠水府天青僊珮下瑤臺
閒將玉管吹明月勾引翩翩彩鳳回

遊匡廬山

欲向匡廬觀瀑布便從彭蠡驟樓船一聲長笑來丹壑
千丈飛流下碧天洞裏樓臺無歲月雲中雞犬有神仙
憑誰呼起巢松者醉擁宮袍對酒眠

度大庾嶺

鑿破鴻濛一竅通至今傳說九齡功天垂瘴雨蠻煙外

路入炎荒火樹中，萬里關河瞻北極。
兩行旌旆過南雄，鷓鴣聲裏端陽近。
榕樹青青荔子紅。

過峽山寺

峽江江上峽山寺，落日峰巒翠作堆。
雲擁半空樓殿出，天然一幅畫圖開。
仙人採藥和光洞，釋子翻經化樂臺。
顧我紅塵車馬客，題詩無暇掃蒼苔。

登越王臺

海上荒臺草樹平，登臨不盡古人情。
白雲萬里懷親舍。

紅日中天望帝京百粵山川秋歷落三城樓閣晚崢嶸
醉來徙倚欄干曲聽徹西風畫角聲

浴日亭和蘇學士韻

危亭突兀倚青山坐對扶桑碧海灣紫霧欲生龍伯廟
洪濤先湧虎門關光搖宇宙花生眼影動欄干酒上顏
遙望蓬萊宮闕曉一輪飛掛碧雲間

遊海珠寺

何年神物抱珠遊遺向滄浪第一洲五色化成金世界

六鼇擎出寶香樓光涵蛟室星辰動影落龍宮日月浮
萬古團團天地裏磬聲敲徹海門秋

登廣城樓

三尺龍泉事遠遊越王臺上望南州一天雨過千山曉
萬里風來五月秋江郭樓臺蠻客市海門煙日蜃家舟
臨戎不有安邊策應愧常何薦馬周

謁金華寺六祖法堂

坐閱人間幾百年雙趺渾似後來禪空空明鏡臺前地

寂寂紅塵境外天風動法林從虎過雲生咒鉢解龍眠
至今月到層樓上應共祥光午夜圓

右說劔閒吟此三世列祖龍虎上將軍呂公遺稿也
呂氏出宋丞相正惠公裔其曾孫守襲慶府死金人
之難詳具宋史中子大理公因徙新昌家焉公固大
理公第五孫也諱定字仲安以武顯孝宗朝爵至殿
前都指揮使龍虎上將軍最貴倨矣吾呂家聲賴公
籍籍其一時功名富貴邑父老相傳赫赫若前日事

至其胸羅星斗腹筍經書發為詩歌引商刻羽直登
作者之壇則槩乎妙有知者國初族祖從覆瓿中得
公遺稿二十八首珍收焉今雖未覩其全書而亦可
以想見其為人必忠孝英特有當年岳武穆劉順昌
之風噫若公者武備而兼文事宋人而踵唐音其流
風餘韻足以傳矣余舊曾手摹一編寘之案頭茲宰
松溪偶簡異囊獲此遂付剞劂以永其傳讀公詩者
幸繇一斑窺全豹云裔孫繼梗跋

附呂聲之雁山雜詠

賀太常黃少卿

自從朝奏一封還，便整歸裝問故山。
剩得清名千載重，何妨晚節十年閒。
慣尋夜雪遼溪路，却謝春風朶殿班。
國史舊編加簡討，春秋直筆任詩刪。

次新邑錢宰黃丞韻

一邑何期獲二賢，花開滿縣總翩翩。
賦詩各出新機錦，裕國還饒內府錢。
槐竹兩行公事辦，絲桐三弄政聲傳。

作成和氣農家好多稼如雲詠大田

過杜潭題曾祖慶源庵

橫江灝氣欲欺裘木落千林水露洲
偶為撻荒投隴畝因而展省到松楸
神駒已應當年兆祥筍還為後裔留
寄與老僧勤灑掃庭前橘綠桂香浮

和張主簿喜雪

夜讀書窗未覺貧朝看萬瓦沒魚鱗
飄來灞岸春風絮瀉下瀛洲玉斛塵
笑我冗懷多奪事羨君清思獨凝神

遙憐夜月山陰道還有扁舟乘興人

題南巖寺

誰把長竿釣巨魚至今蹲石倚空虛
蜂房愛向山厓結鳥跡疑從海島居
入座翠嵐生晝寂夾川紅樹照春餘
任公此去三千載為看芳碑一嘅吁

遊石佛寺

金吾不必問行由此去逍遙物外遊
半塢白雲藏宿鷺一聲橫笛下歸牛
喜瞻傑閣三生像藐視叢林四海州

為寫濯纓疎拙句誰言墨跡至今留

題陳巖庵寄諸兄弟

地接丹邱姥嶺賒山盤曲折狀如蛇每因過此瞻雙隴
何必從傍置萬家孝悌本根時潤澤詩書種子日萌芽
到來豈但春秋祀酌水何妨一獻花

開禧丁卯重過龍門有懷方丈老子

翠屋交空結夏陰征鞍亭午喜登臨披開草棘千叢路
洗出冰壺一片心禪老還尋江浙去詩家誰作楚梁吟

須知珠玉元無踵不惜西風惠我音

謝張漕薦剡

誰人洗甲挽天河玉宇無塵海不波漢使褰帷將命出
淮民挾纊被恩多流離豈憚身安集彫瘵親曾手拊摩
惠利纔施催召亟其如席未及温何

賀葉司業兼中書舍人

英妙才華四十年山林朝市姓名傳何妨萬斛橫江上
不礙千帆過目前我肯尾書干木紙人饒首着祖生鞭

金鑿何日商風雅伴直能呼孟浩然

寄太湖黃縣尉

立項談餘袂輒分乖離數數異朋羣君如天揭行空日
我亦風吹過嶺雲不許范張同飯黍空慙李杜共論文
睽違動涉經年裏碁壘詩壇要策勲

與丁撫幹

兩年肥水喜相逢託契門牆今已重士有襴衡心肯薦
侯如雍齒首先封更看謀畧稱籌幄會見精神坐折衝

敗走苻堅兵百萬圍碁別墅意從容

悼止齋陳先生

萬里長江發自岷作興一代有斯人
六經疑難言前解
千古興亡筆下陳
愛向田間看耜耒肯留天上掌絲綸
如公到處鐫佳句今日池塘草自春

舒城道中

還轅天作十分晴瀉出秋光一派清
走筆欲題人到跡
揚鞭不住馬嘶聲
頃禾晚熟黃雲色
籬菊朝含白露英

得似淵明便歸去候門童稚出歡迎

重陽桐城道中

萬古長淮一帶流從來戰地不容休閒
關千里軍前餉牢落重陽客裏秋
悵望白衣來送酒了無黃菊與簪頭
何人早斷樓蘭首試解君王宵旰憂

九日登資福山呈胡宣教

飛屐來登最上峰千山擁翠景無窮
遙看雲影參差外靜聽泉聲斷續中
今日黃花重九約何時青眼一樽同

好天風月閒相寄早晚南來有過鴻

西寺留題

白石孤雲自在閒紅塵一事不相關寺遮翠靄青蘿外
人到落花流水間欲効錦囊收勝槩慚無玉帶鎮名山
白蓮喜結當年社未厭朝來暮便還

題龍翔觀

曾到龍翔不記年兩峰巍壓水中天潮生潮落青蕪外
人去人來白鷺邊四接遠遊僧萬笠重新舊觀屋千椽

東南送目秋無際
隔岸人家問釣船

和黃教授山堂招飲

鼎彝事業未渠休
鷗鷺尋盟暫與儔
路入芝巖真絕地
客延蓬島盡名流
不辭一洗陶巾醉
更擬雙飛謝屐遊
誰賞洪都高閣句
落霞孤鶩唱漁舟

謝石主簿和章

多君養就大椿年
便腹詩書畫欲眠
絳闕當年名籍甚
白雲他日迹飄然
千軍筆掃人誰敵
九轉丹成世莫傳

倦眼功名旁袖手剩看月露出新篇

詠桂花

獨占三秋壓衆芳何誇橘綠與橙黃自從分下月中種
果若飄來天際香清影不嫌秋露白新叢偏帶晚煙蒼
高枝已折却生手萬斛奇芬貯錦囊

和王子寬韻

綠蔭千重竹清流一帶溪子真耕谷口楊震講闕西手
摘星辰近名登秦華齊古來公相業誰不起鋤犂

春郊

勝日遊郊外嵐光入眼新
桃花開萬樹又是一年人

山行

山花雨後紅野草風前綠
浩歌歸去來不辱在知足

先春

梅花

不把春光較後先清香自是壓羣妍
微酸一點功成日桃李從他逞少年

雲錦

桃花

卷二百二十
擁蓋難遮萬臉紅
爛然雲錦直連空
更看雨過新粧洗
百媚都含一笑中

紫霄亭二首

半空煙雨有無間
碧玉屏開四面山
我欲紫霄亭上望
吹笙人去幾時還

未把浮漚閱世間
蓬萊一水隔三山
試窮千里登臨目
望斷青山白鳥還

芙蓉

楓葉飄林竹隔牆偏于冷淡逞濃粧天教不趁繁華月
要是秋來獨耐霜

括蒼山行雜詠

微風吹雨濕欄干薄霧籠晴帶淺寒一樹紅梅牆外發
誰家美麗倩人看

丹邱道中

夜宿溪頭十里村數星漁火照籬門雁山峭絕經行處
猶帶煙霞入夢魂


緡雲道中

緡雲通道入皇都花滿京城水滿湖借問今來丞相府
後園人有醉歌呼

右沃洲雁山雜詠此呂氏五世列祖節度公遺稿也
公諱聲之字大亨為宋寧宗時人博學篤行名重一
時所著詩數百篇宋儒龍泉水心葉適為之序大畧
云新昌呂大亨師陳君舉友蔡行之全升太學壁記
名在陳下蔡上二先生既貴公獨遺落不偶或戲曰

此所謂阨于陳蔡之間也。恩授平陽丞，再轉節度推官。詩篇博雅，冲曠邑人。至小胥，皆能誦之。葉又作呂丞行，深以公官卑為慨。陳君舉先生為公父修職郎，撰墓誌為諸昆弟作字說。又與考亭朱先生講學筆札相往還。呂氏文獻賴之。公詩既出，當時名人徐宏應、鏞、洎勝國許汝霖、國初王節王霖、陳東之皆有序。讚謂其自出一家機軸，與文學政事相表裏。云刻本傳自宋迄今寶藏于家，余携至松溪公暇展玩命副。

墨子錄授之梓人俾與龍虎上將軍詩並傳不朽云
裔孫繼梗跋



石倉歷代詩選卷二百二十

欽定四庫全書

集部

石倉歷代詩選卷二百二十五

一至

欽定四庫全書

石倉歷代詩選卷一百二十一

明 曹學佺 編

宋詩九十八

林景熙

南山有孤樹

南山有孤樹寒鳥夜遶之驚秋啼眇眇風撓無寧枝托
身未得所振羽將逝茲高翔犯霜露卑飛觸茅茨乾坤

豈不容顧影空自疑徘徊向殘月欲墮已復支

商婦吟

良人滄海上孤帆渺何之十年音信隔安否不得知長
憶相逢處缺月隨我歸月缺有圓夜人去無回期回期
倘終有白首寧怨遲寒蠶苦相弔青燈鑒孤幃妾身不
出戶妾夢萬里馳

故衣

篋中出故衣絡緯聲四壁昔年慈母線一一手所歷春

眷遊子心惻惻虛堂夕逝水不返流孤雲杳無迹空令
攬衣人一線淚一滴衣敝奈有時母恩無窮期終憐寸
草心何以報春暉朝寒縱砭骨念此不忍披且復返所
藏永寄霜露思

九日會連雲樓分得落字

冉冉海霧深荒荒山日薄登高集華裾縱目天宇廓落
葉悲徂年寒英照深酌心醉乃文字意行非澗壑緬懷
斜川遊此道久寂寞胡為吹帽人白首戀賓幕窮途謬

行藏異代懸美惡我愛漉酒中西風不能落

訪二陸故居

風流懷二陸才名動三吳斯人不可作千載空煙蕪當
時聘俊筆萬象爭先驅有如明月璧美價傾鴻都世運
有翻覆韞匱真良圖惜哉去就乖毀此千金軀人生皆
有死百年同須臾獨遺文字芳乃與天壤俱淒淒崑山
寒冉冉谷水枯白鶴久已寂黃犬誰復呼荒祠掛殘陽
扁舟入菰蒲采蓴薦秋水庶以明區區

納涼過林氏居

出郭已虛曠入門轉蕭森筠棲無六月聊以解我襟紅
日不到地白雲時滿林坐久石根冷酒醒荷氣深飄飄
黃冠客臨流鼓瑤琴一鼓洗我耳再鼓空我心山高水
復迴彷彿蓬萊音興盡拂衣去城笳吹夕陰

陳子植草廬成求余賦

老矣杜陵客草堂倚江干故人相幽築皇天愍生還君
家付楚炬結構當時躋謂得風雅力竹木供大官城邊

夜歸鶴杳杳發長歎朱甍昔峨峨碧草今曼曼何如蔭
白茅容膝有餘安我哀喪亂餘人燠半凋殘風淒狐兔
驚露重星斗寒丈夫坐一室此念馳九寰所以草堂人
安得千萬間

曉意

僧鐘覺曙鳥紛飛弄林光宿雨漸離石人起開秋房南
山忽入几相對各老蒼流泉送日月危石支興亡問山
山無言啼猿起前岡

妾薄命

盈盈梁家姝奕奕晉朝使
解珠不論貨得備中櫛侍一
笑金谷春列屋俱斂避
豈知錦步溫已復為愁地
念主惠妾深緣妾為主
累樓頭風雨深殘花抱春墮

別所親

人生重離別况此雙鬢蓬
停柳非故色昨夜吹霜風
臨分復携手野色猶濛濛
愁深轉無語寫入潺湲中
一水分兩支來共高高峰
出山暫相失到海終相逢

酬謝臯羽見寄

入山采薔豸虎據我丘入海尋蓬萊鯨鯢掀我舟
美人渺天末瑤音寄青羽自言招客星寒川釣煙雨
行行古臺上仰天哭所思餘哀散林木此意誰能知

過風門嶺

客來自風門颼颼撼兩袖溪迴衆峰新
巖絕一嶺又行春日微怪禽啼白晝
流年感花稀古道表松秀聊此寄小酌餘酣掬山溜

新豐道中

長飈卷炎埃澄空出秋素迢迢鐵甕城回首隔蒼霧酒
帘颺荒市笳鼓發深戍倚蓬問舟人云是新豐路籬落
雞欲栖野水牛半渡不見抱琴人斜陽在高樹

古松

獨占寬閒地不知搖落天山林猶古色風雪自窮年龜
伏靈根壽禽巢絕頂僂棟梁非所屑幾見海成田

崑巖

神斧何年鑿南山片石盤玉藏僊竒古翠落縣門寒老
木天邊瘦歸雲雨外殘市塵吹不到朝夕靜相看

鄭宗仁會宿山中

挑燈懷舊夢移席近春泉共話忽深夜相看非少年斗
垂天末樹燐出雨餘田亦有茅簷下飯牛人未眠

桐角

田家無律呂聲寄始華桐碧卷春風老清吹野水空客
心寒食後牛背夕陽中不惹林花恨年年送落紅

飛雲渡

人煙荒縣少澹淡隔秋陰帆影分南北潮聲變古今斷
峯僧塔遠初日海門深小立蘆風起乘槎動客心

道中

程入江鄉宿新炊飯帶沙亂山愁外笛孤驛夢中家野
水平菰葉春風足棟花西來三兩客閒說舊京華

寶林寺

圖上追三笑詩中寄七哀孤棲非絕物多難亦成才歲

儉米生竹春寒衣上苔不知遼海客化鶴幾時回

宿台州城外

荒驛丹邱路秋高酒易醒霜增孤月白江截亂峰青
旅雁如曾識哀猿不可聽致家追此夕三十五郵亭

神山寺訪僧

獨客無清伴高僧住別村空山卓錫影斷石繫舟痕
風細松生籟沙虛竹迸根小亭閒坐久落日嘯孤猿

鄭氏西莊

不踏紅塵道結廬依水鄉
遠峰開宿雨高樹表初陽
犢卧野門寂雁飛秋稻香
午橋花竹地回首已淒涼

溪行

風高餘暑盡獨往興悠然
野色延幽步秋聲入暮年
日斜禽影亂水落樹根懸
回首故人遠城笳吹夕燿

僊壇寺西林

古壇僊鶴杳野鹿自成羣
松氣浮清吹經聲出白雲
石穿僧屋過水到寺門分
人世無窮事山中了不聞

寄鄭宗仁

城南懷舊別谷口寄春耕野鶴巢雲老林僧管瀑清養
花疏石髓煉藥伏山精見說孤燈雨年來著易成

趙奧別業

已無湖海夢漸老足閒情野杖日尋壑家書時到城開
池納天影種竹引秋聲亦愛簞瓢樂年來世味輕

夜意

澹然無一事至樂在書牀老石棲雲定疎松過雨香砧

清秋巷迴燈白夜堂涼此意無人會重城醉夢鄉

天台隱者

俗駕不曾到瘦筇時復携肺肝清澗飲鬢髮老巖棲野
巷猶雞犬春城自鼓鞞未應人世外別有武陵溪

新昌道上

江湖猶是客歲月已成翁僊路重雲外人家落木中山
痕經燒黑土脉入泉紅又得春風信孤花照驛東

贈吳秀才林東歸

幾夜高堂夢不知
山水長西風歸雁蕩
落日過烏傷斷影
雲空白孤心草欲黃
終憐負甘旨淚灑蓼莪章

越中送徐君寅歸閩

此地同為客
當秋獨送君
斜陽留薄醉
遠道惜輕分
老泪遺陵木
鄉山出海雲
天南有回雁
音信倘相聞

故宮

驚風吹雨過
歷歷古槐蹤
王氣銷南渡
僧坊聚北宗
煙深凝碧樹
草沒景陽鐘
愁見花甌月
荒秋咽亂葦

辟雍

冠帶百年夢昔遊
今重嗟璧池春飲馬槐市
暝藏鴉堂鼓晨昏寂廊碑
風雨斜石經雖不火歲歲
長苔花

孤山

回首咸平夢清風自滿湖
乾坤一士隱身世此山孤
鶴去空秋影梅開向舊株
耳孫今白髮持酒酌寒蕪

舟次吳門

懷古心猶壯臨流影自孤
湖煙迷檣李城木出姑蘇
草

暗春驚鹿菰香秋試鱸青樓舊時月無復聽吳歎

釣臺

曾來天上宿夢不離寒磯宇宙雙臺迴煙波一客歸姓
增江郡重墓隔越山微千古登臨意淒涼帶夕暉

宿七里灘

寥落空山上買魚開酒樽亂山含雪意孤艇寄楓根灘
近不成夢鴻飛欲斷魂偶呼黃帽語一犬吠前村

過北雁蕩山下

驛路入芙蓉秋高見早鴻
蕩雲飛作雨海日射成虹
一水通龍穴諸峰盡佛宮
如何靈運屐不到此山中

禹廟

萬國曾朝會羣山尚鬱盤
嚴祠鎮玄壁故代守黃冠
空入雲根古梁歸雨氣寒
年年送春事來拂蘚碑看

荷錢

盈盈新疊碧難借柳條穿
鑄景菰蒲外買隣鷗鷺邊
炎官初掌柄水國不書年
漸長薰風價折蒲供酒舫

訪武伯山居

照書雙眼碧天欲壽斯文白髮前朝士青山半屋雲遲
花春後見遠瀑夜深聞迴首重華夢荒田自鹿麕

漁笛

楚竹聲何遠蒼茫想釣舟橫當半篷月吹破一江秋落
葉紛前浦驚鴻過別洲曲終枕簟卧無夢到涼州

雪後

開簾殘酒醒雪意尚垂垂夜色沈奎久春容變柳遲寒

塘鷗自散荒歲雀同飢便欲誅茅隱何山有紫芝

山中早行

短策穿幽徑山樵半掩扉月斜林影薄石盡水聲微
犬隔離吠孤僧何處歸相逢松下立風露滿秋衣

疎懶為四明何君賦

野意雲同散閒門草自新不知塵網密為謝客車頻風
月兼忘我山林亦恕人咸陽歎黃犬榮辱古為隣

溪亭

金大邑人三言
卷二百二十一
清秋有餘思日暮尚溪亭高樹月初白微風酒半醒獨
行穿落葉閒坐數流螢何處漁歌起孤燈隔遠汀

答陳景賢

一劔掛寒壁艱危氣不衰髮根朝鏡覺書味夜燈知夢
斷潮生枕愁新雁入詩思君心欲折又負菊花期

送葛居士住栖碧庵

越山巉巖越臺孤井中雙鯉曾走吳滿坡叢竹遺舊箭
回首霸業空煙蕪詩人訪古凌絕壁危樓竟欲老深碧

聲搖孤枕海濤壯影伴瘦筇山月白了然道者亦離塵
一龕松下分秋雲祇今虎豹滿平陸鍊骨誰與箋青旻
琴心劔氣兩寂寞醉墨淋漓風雨落九十九峰歸夢寒
玉笙泠泠跨飛鶴

春感

柳花袞雪春冥冥溪風一夜吹為萍萍隨風去渺流水
人生無根亦如此故山入夢草芊芊半窗疎雨寒食天
曉來白髮稀可數多少朱顏化黃土高原冉冉青煙斜

麥飯灑松能幾家子規叫殘金粟暮繭紙蘭亭已飛去

荷珠

霞衣葱珮來珊珊水晶之宮綠玉盤誰與馮夷作戲劇
貝闌驅入神瓢翻又疑罷織鮫人泣碧窪融作水銀汁
圓或爲璧方爲珪寒光滉漾不可拾古來敬器戒覆傾
真宰之柄常惡盈季倫買笑輕百斛金谷轉首迷榛荆
紛紛魚目爭貴惜道眼獨懸諸幻息須臾海霽山日高
綠雲萬柄淨如拭

冬青花

冬青花花時一日腸九折隔江風雨青影空五月深山
護微雪石根雲氣龍所藏尋常螻蟻不敢穴移來此種
非人間曾識萬年觴底月蜀魂飛遶百鳥臣夜半一聲
山竹裂

喜劉邦瑞遷居采芹坊

弄鄉聚散笑匆匆歲月無情忽兩翁燈火城南聽夜雨
桑麻社曲憶春風百花新意皆歸燕萬里離愁獨寄鴻

重約扁舟尋禹穴夕陽疎樹亂雲東

讀秦紀

瑯琊臺上晚雲平虎視眈眈隘八紘萬里不知人半死
三山空覺草長生兆來鬼壁沙邱近威動神鞭海石驚
書外有書焚不盡一編圮上漢功名

項羽里

英雄蓋世竟何為故里淒涼越水涯百二勢傾爭逐鹿
八千兵散獨乘騅計疎白璧孤臣去淚落烏江後騎追

遺廟荒林人酹醉至今春草舞虞姬

陪王監簿宴廣寒遊次韻

銀橋疑駕海天長丹粟離離照翠觴影浸山河瓊殿冷
舞深風露羽衣香亦知廣莫元無野却笑溫柔別有鄉
手折一枝驚昨夢素娥憐老授玄霜

漁舍觀梅

冷雲漠漠護籬陰瀟灑苔枝出竹林影落寒磯和雪釣
香浮老瓦帶春斟幾憑水驛傳芳信祇許沙鷗識素心

回首西湖千樹遠扁舟寂寞夢中尋

虎邱寺

突兀僧房倚翠微金精幻虎霸圖非瓊田萬頃山如湧
鐵壁千尋澗自飛堂在經聲通老石樓開塔影落秋衣
千年幽獨嗟誰氏斷刻苔深帶夕暉

鶴林寺

流水蒼松石逕斜甕城城外梵王家僊林不返雲巢鶴
僧鉢曾移海國花剝落苔碑秋卧草荒涼竹院午敲茶

當時一擲乾坤手曾向山窓倚暮霞

焦山寺

山裏中流水作林寶蓮鼇背翠沈沈半空但覺煙嵐合
三面不知風浪深僊井浴丹開曉日海門浮玉澹秋陰
洞深瑤草無人采瘞鶴殘碑浸碧潯

舟中書事

村酒沽來濁可斟扁舟過雨繫楓林午香吹稻海田熟
秋蔓引瓜茅屋深天地暗塵歸客鬢江湖斜日動鄉心

衰年自笑爲形役空羨閒鷗卧水陰

雲門卽事

最愛林中過客稀坐分孤石澹忘歸僧閒時與雲來往
鶴老人知城是非瀟灑山光秋入晝清寒花氣曉侵衣
一溪截斷紅塵影西有任公舊釣磯

寄葛秋巖

吳地繁華半劫灰故山秋遠夢頻回琵琶亭老春風棹
桑落洲寒夜雨杯歲月悠悠人幾換關河渺渺雁空來

酒酣欲寄登臨眼黃葉斜陽滿廢臺

歸白石故廬

四隣井竈出荒墟獨鶴歸來認舊廬
一選蒼苔供瘦策半簪華髮伴殘書
斜陽巷陌語初燕新水池塘生細魚
小立春風憐寂寞忽吹花片入襟裾

春暮

乾坤萬事上眉端寂歷東風獨倚闌
白髮餘春能幾醉綠陰疎雨不多寒
香飄苔選花誰惜影落沙泉鶴自看

碧眼野僧知我意素琴携就竹西彈

用韻寄陳振先同舍

心事淒涼寄雁聲石田苔滿未妨耕西風戍角催年換
殘夜江樓見日生煮茗敲冰貧有味看花隔霧老無情
湖山猶憶笙歌底笑領春香綠滿觥

紀夢

江風吹夢到書樓樓外新鴻數點秋葛老巾山空落照
晉時帶水向東流魚蝦市散荒煙合鳥雀門深細草幽

何處一聲長笛起，覺來孤客在滄洲。

贈天目吳君實

詩興翩翩度雪溪，巖雲半護舊留題。
夢回殘月蒼梧曉，家在春風秀麥西。
萱草堂深衣屢寄，桃花觀冷酒重携。
故山石鏡無人問，空與寒猿照影啼。

答鄭卽翁

初陽蒙霧出林遲，貧病雖兼氣不衰。
老愛歸田追靖節，狂思入海訪安期。
春風門巷楊花後，舊國山河杜宇時。

一種閒愁無着處酒醒重讀寄來詩

東山渡次胡汲古韻

客來持酒灑煙霏空想高風意欲飛老洞藏雲安石卧
孤舟載雪子猷歸一川白鳥自來去千古青山無是非
欲上危亭愁遠眺廢陵殘樹隔斜暉

寄陳用賓

水竹脩脩稱客居閒時挾策自觀魚為儒老入他州籍
懷古幽探異穴書日暮碧雲歸已晚歲寒青桂嗅如初

文章自古多憎命
狗監無勞誦子虛

寄七星山人

十年疎髻為誰斑
天借儒冠日月閒
欹枕寒生雙瀑澗
開門春滿七星山
鶴歸尚覺遼城是
鷓老空聞蜀道難
欲覓九還憑寄語
青牛何日度函關

夢中作

昭陵玉匣走天涯
金粟堆前幾吠鴉
水到蘭亭轉鳴咽
不知真帖落誰家

題陸大參廣陵牡丹詩卷後

南海英魂叫不醒
舊題重展墨香凝
當時京洛花無主
猶有春風寄廣陵

歸自越避寇海濱寒食不得祭掃

持酒無因灑墓松
禽聲花色慘東風
去年此日身為客
及到鄉山又客中

秋夜

片月相隨過竹居
風生荷葉酒醒初
窗扉半掩秋蟲急

猶有殘燈守故書

吳中會故人

一聲秋雁荻花秋
片月吳松共客舟
却憶去年今夜月
思君獨上越山樓

別方槐庭山人

夜闌深語別寒缸
別意蕭蕭竹半窗
明日孤帆鴻影外
東風殘雪過曹江

葛仙翁石牀

鈞天夢破珊瑚枕巖壑春供翡翠屏一卷黃庭雲半席
宵深讀與嶺猿聽

館娃宮

苧羅山女入宮新四壁黃金一笑春步輦醉歸香逕月
隔江還有卧薪人

宋武帝居今爲壽邱寺

青衣夢破滿林煙一擲乾坤亦偶然僧屋翠微看月上
江山猶似永初年

夢回

夢回荒館月籠秋
何處砧聲喚客愁
深夜無風蓮葉響
水寒更有未眠鷗

聞蟬

翼綃微動自宮商
幾曳殘聲送夕陽
喚得槐柯芳夢覺
薰風一曲換西涼

其二

近交紙薄雲翻手
舊夢冠空雪滿顛
却憶畫舫曾聽處

夕陽高柳斷橋邊

跋

古今扶綱常立人極者忠與義而已昔伯夷叔齊恥食
周粟孔子賢之賢其義也張巡許遠致身于國百世祀
之祀其忠也余觀霽山斯集慷慨激烈闊步遠視冬青
樹事爲所難爲於戲宋亡久矣此人此心果何爲哉忠
義激之也觀斯集厥有感于斯歟厥有取于斯歟嘉靖
辛卯歲三月浙江按察司副使京口丁瓚跋

附趙萬年裨幄集

臘月初三日敵人攻城以強弩射退獲捷

四圍鉦鼓震天鳴敵騎平明盡逼城萬弩應弦因退走
却疑城上有神兵

正月初三日至初五再攻焚其攻具敵騎大却
驚車虎砲與雲梯堪笑邊人巧用機大帥胸中攄妙算
一時談笑盡灰飛

臘八危家餉粥有感

襄陽城外漲沙塵
矢石叢中未死身
不爲主人供粥餉
爭知臘八是今辰

二月三日登城郊外春色可人而敵騎未退

平生春日不傷春
今日逢春愁殺人
觸目旌旗非族數
無言桃李少精神
可憐野興牽羈興
不分紅塵雜塞塵
直待元戎攘却後
峴山無惜領嘉賓

毀土山

築土爲山號距燠
邊人癡計要攻城
誰知壯士中宵出

三月工夫一夜平

十三日納合道僧攜印來降

屹若金湯不可攻此時誰肯自投降勢窮方獻將軍印
何似當初莫渡江

徐招幹請喫鰕魚桐皮

簷外桃花片片飛垂涎漢水鰕魚肥桐皮一作飢腸飽
似得精兵解敵圍

程機宜宅喫豆粥

豆紅米白間青蔬髣髴來從香積厨異日大官還飽飫
不應忘却在蕪萋

偶成

一心憂國不憂家掠面黃塵帶晚沙郵傳不通音問隔
家人夜夜卜燈花

園中墮馬傷足方愈牙痛累日

敵騎塞東津迤邐困此身足傷方復步牙痛又搖齧忍
見邊塵暗俄驚歲事新龍鍾三十九碌碌度青春

歲暮

歲暮嗟為客，那堪復被圍。
一心惟許國，視死已如歸。

除夜

除夜春牛吼，開正敵騎多。
有謀思却敵，休問命如何。

石倉歷代詩選卷二百二十一

欽定四庫全書

石倉歷代詩選卷二百二十二

明 曹學佺 編

宋詩九十九

王鎡

別虞君集

瓦瓶擔酒去送客
石橋東潮過汀沙
上船迴島嶼中桃
花三月雨楊柳五
更風明日思君處
渡頭煙水空

送默然上人歸天台

孤雲不定心持鉢，度寒林野飯青蒲潔。
客程黃葉深，海風潮水發。山雨燒燵沈，歸到石橋日。
應看瀑布吟。

錢塘江

涼疎萬柳條，秋滿石欄橋。吳越興亡事，晨昏來去潮。
雲開天日近，水接海山遙。望到西陵渡，風帆穩自飄。

塞上曲

黃雲連白草，萬里有無間。霜冷鬪髯哭，天寒甲冑閒。
馬

嘶經戰地鷗認打圍山移戍腰金印將軍度玉關

買舟

赤欄橋上路幾度卜歸期流水無迴日行人有老時潮
來江勢逆月出海門遲風順輕舟駛蒲帆盡夜吹

早行

客程因太早却費一更眠落月已歸海殘星猶在天櫓
聲荷葉浦螢火荳花田隔岸誰家起青燈遠樹邊

別黃吟隱

飲乾分別酒話久未移舟潮水催行客海山生遠愁蟬
聲秋浦樹雁影夕陽樓今夜相思夢蘆花第幾洲

秋深

風露損衣裾秋深懷故廬僕方談夜夢客至得家書子
黑石蓮老柿紅霜葉疎今年籬下菊遙憶少人鋤

訪翟梅山

諸老彫零盡江湖今有誰半生行客慣多難識君遲花
屋春風酒梅山雪夜詩莫爲名釣出世事正如棋

晚春卽事

雲氣不分明
天陰忽又晴
闕涼溪鵲浴
知雨樹蛙鳴
仙藥黃精飯
齋蔬白椹羹
惜春吟未就
閒踏落花行

山中

榮枯皆定數
枉作送窮吟
有色非真畫
無絃是古琴
青松秦世事
黃菊晉人心
塵外煙蘿客
相尋入遠林

避亂柯巖綠坡諸公以詩見寄

柯栝地西東
音書久不通
山河隔今古
天地老英雄
局

敗棋難着愁多酒易中
花前多少恨無語寄春風

感秋寄白雲趙寺丞

囊裏不藏金相隨只破琴
每因看月夜長動故人心
敗草關河路秋風楚越砧
愁來不成寐壞壁更蛩吟

谿村

水路隨山轉谿晴踏軟沙
斜陽曬魚網疎竹露人家
行鱉上枯岸飢禽銜落花
老翁分石坐閒話到桑麻

寄友

髮影明寒鏡蕭蕭亦自憐故人難會面行客又經年晴
雪添崖瀑春雲雜燒燵相思有書札寫盡夜燈前

寄杜北山

倦客蕭蕭兩鬢秋柳絲無力絆歸舟曉風落葉辭高樹
夜月行人在別州千里關河鄉國夢一江煙浪古今愁
雁聲過盡青天闊却憶同登望海樓

暮春寄僊洲舍弟

去年妍菊醉重陽今日誰知各異鄉落葉石欄霜信早

敗荷池屋雨聲涼人情好惡花甘苦世事榮枯草短長
別有駿鷗雙翮健剛風摩透入蒼茫

宿香巖院

地爐煨火栢枝香借宿寒寮到上方山近白雲歸古殿
風高黃葉響空廊敲門僧踏梅花月入夜猿啼楓樹霜
夢醒不知窗日上時聞清磬出松堂

古杭感事

國事彫零王氣衰東南豪傑竟何之雲寒廢殿排斑石

草卧前朝記事碑沙漲浙江龍去遠天寬北闕鳳歸遲
可憐不老吳山月曾照官家寵幸時

山居

屋頭蘚樹蛻鳴蛩池上溝泉鑿石通香老蒲花春洞影
涼生榭葉午窗風泥瓶開酒留樵客簞笠穿雲訪藥翁
雖是一貧清似水定無徭役到山中

金陵感秋

魚書難寄水空流兩袖西風破黑裘客夢蘆花晉城月

歸心楓葉浙山秋世情老去諳方熟愁事來時醉便休
滿目關河懷古恨如今何處問孫劉

湖山卽景次尹綠坡

湖山掩映鴈潭秋今古詩人說勝遊綠柳影分騎馬路
丹楓葉落釣魚舟前坡風送歸樵笛別墅雲藏賣酒樓
長記尋梅冰雪裏羶靴駝帽鷓鴣裘

尹綠坡山間吟所

苔痕分路見人家犬護籬根卧落花一片林塘詩境界

四時花菓隱生涯鋤山揀日春栽藥汲水和雲夜煮茶
耕錄有文須點看旋搖松露入硃砂

寓龍虎山中示張鍊師

蓮盃送別萬峰雲龍虎山前過小春草屨慣穿枯嶺葉
布衣猶帶舊京塵瓊寒不見遊僊夢路遠誰憐倦客貧
東望海門歸未得北風吹雪滿唐巾

春酌

酒闌歌罷翠簾遮月柳驚啼子夜鴉多少斷雲心上事

結成香夢是梨花

西湖

南北高峰叫杜鵑
斜陽浮翠斷橋邊
畫船歸盡江湖夢
一半樓臺楊柳煙

怯暖

怯暖新裁白苧衣
棋聲深院客來稀
春風無力晴絲軟
絆住楊花不肯飛

秦望山

祖龍癡欲望長年却遣君房渡海船
枉去蓬山覓丹藥
桃源亦自有神仙

深春二首

夾泥花上燕巢邊翠箔柔空蠶又眠
天氣乍晴風候別
坐看盆藕出雙錢

燕子來時春又休暖風吹綠上枝頭
繡簾不隔荼蘼月
香影無人自入樓

采蓮曲

卷一百二十二
羅袞濺濕髮雲偏搖落香風滿畫船忽憶年來顛顚夢
鴛鴦正在藕花邊

春閨辭

桃吹紅雪上簾鉤楊柳風絲拂畫樓日透欄干人病酒
賣花聲過懶梳頭

芳庭植上人

苔侵坐處石頭青滿屋春雲不用扃入定醒來香印冷
一簾花雨濕殘經

喜涼

吹笛何人在小樓夜深不下玉簾鉤涼風敲落梧桐葉
片片飛來盡是秋

宿西上竺

閒收石上着殘棋山月無聲鶴睡時落葉打窗霜滿屋
有僧吟得夜寒詩

水居

飛鷗貼水水連天一半青山半是煙日暮潮迴漁父醉

不知船閣淺沙邊

斷橋春望

拾翠車閑輦路塵
山南山北杜鵑春
誰家庭院東風裏
吹出桃花不見人

湖上晚望

酒醒湖光生嫩涼
卧船吹笛藕花香
遊人盡逐鶯花去
一片閒情在夕陽

漁父吟

竹絲藍裏白魚肥
日落江頭換酒歸
只恐明朝風雪凍
老妻連夜補蓑衣

壽光宮

井氣蒸雲濕石欄
虬鬚道士自燒丹
開門風帶琴聲出
一陣松花滿醮壇

裁衣曲

燒罷心香午夜闌
玉纖輕捻剪刀寒
衣成恐不如郎意
獨試燈前照影看

花下作字付葉柘山使者

花蘚層層潤石牀
綠陰多處自生涼
閒將筆染茶蘼露
寫得春辭滿紙香

燈花

喜信今宵報與誰
玉人曾剪畫雙眉
等閒閒落銀缸見
只閉春風不得知

月洞書屋

自寫自詩粘壁上
何須古畫與名碑
隔牆風落閒花片

日日飛來入硯池

病中

鏡裏初疑看不真，衰顏只恐是他人。
醫言斷酒方除病，母戒觀書亦損神。
卧久不知黃葉落，起來添出白髭新。
自梳頭髮斜陽下，手脫隨風半委塵。

石倉歷代詩選卷二百二十二

欽定四庫全書

石倉歷代詩選卷二百二十三

明 曹學佺 編

宋詩一百

劉壘

補史十忠詩 并敘

詩以厚倫美化爲本非曰諧俗寄情而已卽千篇奚益
每思張許二顏同時死國名芳唐史與天長存近代死

節數公何愧往昔顧麥秀黍離無由做柳州狀逸事上
太史庶幾不朽竊以慨念更後幾年遺老漸盡舊聞銷
歇將無知有斯人者悲夫哀哉死臣子職分古人常事
爾死矣寧顧其傳不傳乃亦不可無傳者為其係彝倫
闕風教厲後代之臣子愧前日之不如數公者也採清
議得忠義臣十人史不書各賦十韻纂其實曰補史詩
知潭州湖南安撫使李公芾

三已甘退休十連起遲暮伊誰急求子流落乃不怒黑

雲來如山殺氣震平楚
恭惟君父命封疆
以身護闔門
義不辱呼卒汝善處飛魂隨劍光
自己投火去天泣鬼神
愁地搖山嶽
仆吾非莒柱厲敢以死醜主
正自常事
耳命義逃安所冲遠誰與儔
睢陽有張許

池州通判權州事趙公

卯發昌州人妻雍氏

若人作何狀立節乃殊偉
人言此蜀珍位卑名未起
坐分秋浦月攝此千里寄沙頭
風色惡寒城凜弘峙吾聞
開闔迎棄道亦復耻
茲惟城郭臣大義吾知己
間道走

帛書灑血別玉季細君絕可人雙飛同一死南八彼男
兒此婦乃如此骨朽香不廢吾詩當清史

丞相都督信國公文公

天祥丙辰狀元

時平輒棄置事迫甘前驅嗚呼忠義臣匪直科目儒江
寒朔吹急列城同一趨豈不寄便安綱常乃當扶移檄
倡諸鎮奮袂躬援枹川決莫我回萬險棲海隅天乎復
不濟道窮竟成倖一死事乃了吾頭任糝糊悠悠譏好

名責人無已夫三衢有魁相投老作尚書

謂留夢炎

叅政行丞相事陸公秀夫

天地無託足海天同隰光明知復何爲不忍隳三綱裸
薦覲少延謳歌寧遠忘或者莒在齊聊且帝一方竭蹶
竟委頓臣謀非不臧運去天莫留力盡心彌強終不負
吾主名義天地長懷璽隨龍遊舉室水中央斯人文華
士乃爾百鍊剛機雲儻通譜應羞朝洛陽

前左丞相江文忠公萬里弟萬頃

匡廬雲錦屏鴻儒產其下風神儼如龍天矯莫可駕卷

懷經濟具婆婆洛中社怪事玉牀搖清晝天忽夜突騎
從何來陰風飄屋瓦大臣義有死欲避吾不暇庭前環
止水萬事付一捨從容友靈均朝野動悲吒愍章極哀
榮汗簡誰記者倘有南熏書季方足堪亞

江西制置司都統密公侑

臣有置身義豈計官崇卑偏將知死忠不曰天下奇漢
節旣披靡失位趨江西閭帳駐臨汝招徠樂其歸雪寒
南浦愁羽檄斬濟師一將奮風虎鼓行亟馳踰嶺疾

戰苦裹瘡呼健兒坐縛膝不屈伏鑽甘如飴小臣裨校
耳職也宜死綏廬州大將在白首豎降旗

淮東制置使知揚州李公庭芝

淮海接風塵胡乃似鐵壁卧護有天人十載藉福力重
來人未老愁絕事如昔苦戰孤城危痛哭天柱折夢遊
三山上人倫浮海出突圍志南征吾欲重建極天弗鑿
臣忠冥冥墮叢棘先軫面如生萇弘血化碧臣死誰復
知臣忠終不易一將更大事嚼舌死罵敵

樞密閩廣宣撫使陳公

文龍戊辰狀元

淳熙名宰孫比德粹如玉決科魁偉英駸駸薦冠肅黜
田煩諫疏相嗔俄喉逐補郡仍免歸黃流已漫陸天族
日光薄力疾支顛覆蹉跎南冠繫道病死不辱往昔五
峰堂傾蓋語跋燭斯人真妙人哀哉慳厚祿長揖丙辰
魁各天並黃鵠不有二忠存千古笑科目

少傅樞密使張公世傑

士有守節死豈以責武夫武夫尚能竒消得銀管書何

許熊虎英鐵面美髯鬚護寒久枕戈趕難甘殞軀金山
定活着志願嗟違初江心集羣策炎精回一壺間關障
海嶺萬死存趙孤時也可奈何北風散檣烏漂漂竟何
之無乃膏鯨魚涓濱多貴將反笑斯人迂

四川制置使知重慶府張公珩

坤維拓提封形勝古天府血戰五十秋零落餘八柱江
南傳箭急誰暇此回顧落日古渝城杖鉞乃甚武天東
旣雖墮吾自強支柱渡瀘躬討逆歸來戰彌苦蕭條下

夔門機穽伏中路咄咄快敵仇誰歟掩坏土哀哉關西
雄國亡猶不負同時督軍將腰金插雙虎

附劉麟瑞詩

忠義總管田公燧鳳守李公寔

天西戰士競銜枚乘會關夷路始開兩蜀金湯隨水逝
三秦烽火照天來鳳州文武渾無愧馬嶺英靈只自哀
後夜魂歸何處寓隴頭蕭索一枝梅

天水知軍時公當可西和總管陳公瑀

天水西和兩將強七書貯腹負剛腸魚麗陣布刀如雪
馬革屍空骨似霜廉藺昔存秦莫敵關張今敗蜀終亡
輕財得士人猶惜長想英風慨智囊

金州守臣和公彥威統制楊公興福

貔貅曾是守饒風扞拓金房未易攻十八谷開通徼外
五千兵勁入關中賀蘭不救睢陽敗諸葛猶存越嵩功
當日更推楊統制馬傷軍沒箭飛紅

同慶知府李公冲偕死節諸公

諸公耿耿抱精忠
炎運將灰日不東
北戍躡陵羣盜血
西陲震蕩列城空
香凝燕寢榮何在
鼎沸魚遊計已窮
玉石俱焚天亦泣
千年誰爲憶高風

援襄都統制張公貴

忠勇堂堂貫斗牛
英雄端下愧兜鍪
鹿門雲合張羅網
龍尾波翻化鬪髀
雙廟有靈開正祀
孤城無援屹中流
由來死節男兒事
却笑明年有客羞

守襄都統制牛公富范公天順

將軍志喜豎降幡
偏將能知大義存
頭觸危樓輕烈焰
脰經孤館凜忠魂
聲沈刀斗摧城影
塵掩干將滲血痕
世遠事殊遺老盡
更無人解說襄樊

沙洋堡裨將邊公居誼

兵威破竹列城驚
誰信偏裨不肯迎
兩箭離弦聲霹靂
二雄交斃氣崢嶸
可憐侯服微臣在
忍見人間大厦傾
萬木凋零風雪裏
空餘鐵樹一花明

丞相江公萬里知府江公萬頃

名重天闈侍太微昔年南國秉樞機人歸綠野身猶健
兵滿紅塵世已非止水亭前風浙浙鄱陽城外草依依
棣華相映人間瑞節惠隆名世所稀

宗室趙公崇源

南風不競慘悲聲幙燕泥牛總是驚玉牒名香時已逝
金枝花悴本難榮身明六籍忠仍孝軍滿孤城死亦生
後度推敲明月夜江村村外寄幽情

端明招討使江公立信

如此奇才正可憐
曾陳大計爲安邊
天存廟社施籌策
地限藩籬老歲年
獨眼明明尋趙地
丹心耿耿向淮堧
江南寸土聯區脫
慟哭高沙赴九泉

湖南安撫知潭州李公芾

平楚樓頭矢石驚
焚香稽首別宸京
盡殲妻子期全節
寧死封疆不忍生
煙燄張空墮趙壁
旌旗倒影下湘城
善刀人在同觀化
名與澄江一樣清

江東運判趙公淮妾某氏

石頭城昔號金湯岌岌孤墉戰馬場西日突圍逃溧水
南冠荷校說維楊血凝漢節誇男子身寄秦淮藉女郎
千載妾身貞更潔仰天哭向水雲鄉

沙市監鎮司馬公夢求

荆水滔滔百尺渾何來淺縮漫潺湲木城聯岸風輪吼
沙磧屯雲火炬燔效死小臣懷綠綬偷生天閭愧朱轡
下官名姓君知否涑水先生七世孫

叅政高公應松

腸斷吳山錦繡叢六更聲絕海潮空千門鎖月移行在
八駿乘風憇會同扈蹕孤臣慙主辱征鞍萬里哭途窮
兩宮緩緩趨朝陛回首天南獨死忠

蜀帥張公

玉壘雲浮五十秋關西虓將勇無儔三吳甌墮猶堅守
八柱唇亡不耐愁瀘水捷收勞腰褭夔門機伏失兜鍪
吾君不負吾寧死遺恨誰憐快敵讐

儒士王公士敏

此行無復望生還
留取哀吟宇宙間
報國豈能恢漢土
遺民空自戀吳山
清風勁節英靈在
斜日沈輝歷數慳
寂寂園扉終不悔
忠魂莫恨左輪殷

嗣秀王與釋瑞安守臣方洪

派接天潢本近親
更生忠節古無倫
千軍守禦來閩嶠
半歲勤王護宋民
巷戰血流生不辱
劔飛魂逝死能神
風流喜遇莆城友
携手泉扃萬古春

樞密張公世祿

曾擁貔貅奏凱歌
匡山雲暝竟蹉跎
地空九有棲荒服
寨列千艘保海阿
龍躍壘沈天若此
鳥鳴矻絕事如何
鯨波沃日炎光熄
凜凜英魂尚枕戈

江東制置使謝公枋得

草履麻衣謾蔽形
十年賣卜慣零丁
願從楚地師龔勝
欲向遼陽友管寧
采石吟成期絕粒
娥碑讀罷棄餘齡
一門盡節均無愧
千載西山疊疊青

美人朱氏

給事中宮已歷年蒙恩扈從赴幽燕名王索好緣難合
烈婦捐生節已全日晏寢門疑鎖鑰宵長驛館泣嬋娟
同來小妮猶堪詫一樣清風兩地傳

附唐涇詩

字清父道州龍山人

江南紀事

吳山一髮暮雲孤愁向相纒訊故都鳳去只餘韶樂在
雁來還有帛書無杏壇有客陳孤注平隴何人復五銖
歌徹黍離風雨惡南山深處叫烏烏

閩亡徙東廣

逝泉已矣又茹猶半壁乾坤只恁休頻歲建杓移北斗
何人持節救東甌煙蜚檣艫風濤怒雲鎖樓臺日月愁
南望羊城天欲暮可堪回首問神州

廣亡徙海

箕冠如櫛擁茅旌誰執駢毛軟晉盟遵海而南闕氣數
渡江以北少功名火旗掩靄雲藏闕水陣周遭雪壓城
一榻不容人鼾睡那知霧島是神京

匡山亡

萬里輿圖入朔方
搖搖孤注海之陽
石尤風惡雲藏軫
天駟星沈月掩房
島上有人悲義士
水濱無處問君王
羲和指着烏飛路
去去虞淵暮色蒼

讀史懷友

羞登廣武議英雄
匣却吳鉤弢却弓
幕下清談王太尉
門前白馬褚司空
一編袞斧風塵表
千古綱常天壤中
說與華陰捫虱老
何曾正朔在江東

附彭秋宇詩

乙亥紀聞

羽書朝暮漲氛埃
天詔勤王起草萊
塞上風高鷹颺去
江頭霧暗馬飛來
諸賢忠愛謀安出
四將英靈喚不回
漠漠雪天秋萬里
飛鳴無數雁鴻哀

秋興

沙塵破褐客秋風
落落親朋半老翁
野曠有時聞嘯虎
天寬無處寄征鴻
四方玉帛燕山北
萬里帆檣海水東

回首可憐歌舞地
芳花石礎樹陰中

其二

西風捲地送淒涼
目斷歸帆落日黃
雁過江天雲漠漠
龍遊滄海水茫茫
故人入夢三更月
近事驚心兩鬢霜
試把濁醪澆磊砢
樽中猶帶芷蘭香

世事

茫茫世事等浮萍
愁緒方濃醉又醒
日月雙飛天不老
干戈百戰地常腥
此時弓馬多秦戍
何日衣冠見漢庭

宇宙西風愁不盡誰家門巷草青青

石倉歷代詩選卷二百二十三